

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆ 2005 ԹՎԱԿԱՆԻ ԴԵԿՏԵՄԲԵՐԻ
29-Ի N 2338-Ն ՈՐՈՇՄԱՆ ՄԵՋ ԼՐԱՑՈՒՄՆԵՐ ԿԱՏԱՐԵԼՈՒ Մ Ա Ս Ի Ն

Հայաստանի Հանրապետության կառավարությունը որոշում է.

1. Հայաստանի Հանրապետության կառավարության 2005 թվականի դեկտեմբերի 29-ի «Հայաստանի Հանրապետության կառավարության 2002 թվականի ապրիլի 20-ի N 438 որոշման մեջ լրացում կատարելու և պատմության և մշակույթի անշարժ հուշարձանների տեղափոխման կարգը հաստատելու մասին» N 2338-Ն որոշման մեջ կատարել հետևյալ լրացումները՝

1) որոշման մեջ՝

ա. վերնագիրը «ՏԵՂԱՓՈԽՄԱՆ» բառից հետո լրացնել «ԵՎ ՓՈՓՈԽՄԱՆ» բառերով,
բ. 2-րդ կետը «տեղափոխման» բառից հետո լրացնել «և փոփոխման» բառերով.

2) որոշման հավելվածում՝

ա. վերնագիրը «ՏԵՂԱՓՈԽՄԱՆ» բառից հետո լրացնել «ԵՎ ՓՈՓՈԽՄԱՆ» բառերով,

բ. 1-ին կետը «տեղափոխման» բառից հետո լրացնել «և փոփոխման» բառերով,

գ. 2-րդ կետը «տարածքը պետական» բառերից հետո լրացնել «ռազմավարական» բառով,

դ. հավելվածը լրացնել հետևյալ բովանդակությամբ նոր՝ 2.1-ին կետով.

«2.1. Հուշարձանը փոփոխվում է բացառիկ՝ նրա՝ սկզբնական ու հարմարեցված գործառնական նշանակությամբ օգտագործման անհնարինության և (կամ) շահագործման նորմատիվային պահանջներին համապատասխանեցման դեպքերում: Հուշարձանի փոփոխումը չի կարող զուգորդվել նրա պատմական, գիտական և գեղարվեստական արժեք հանդիսացող արտաքին ու ներքին ծավալների, դրանց առանձին տարրերի ու դրվագների անդարձելի խեղմամբ, աղճատմամբ կամ ոչնչացմամբ:»,

ե. 3-րդ կետը շարադրել հետևյալ խմբագրությամբ.

«3. Հուշարձանը տեղափոխվում և փոփոխվում է լիազորված մարմնի դրական եզրակացության հիման վրա: Հուշարձանի տեղափոխման և հանրապետական նշանակության հուշարձանի փոփոխման աշխատանքները կատարվում են Հայաստանի Հանրապետության կառավարության թույլտվությամբ, իսկ տեղական նշանակության հուշարձանի փոփոխման աշխատանքները՝ պետական կառավարման տարածքային մարմինների թույլտվությամբ:»,

զ. 4-րդ կետի առաջին պարբերությունը «տեղափոխումն» բառից հետո լրացնել «և փոփոխումն» բառերով,

է. 4-րդ կետի երկրորդ պարբերությունը «տեղափոխումն» բառից հետո լրացնել «և փոփոխումն» բառերով,

ը. 5-րդ կետը «տեղափոխումն» բառից հետո լրացնել «և փոփոխումն» բառերով,

թ. հավելվածը լրացնել հետևյալ բովանդակության նոր՝ V գլխով.

«V. ՀՈՒՇԱՐՁԱՆԻ ՓՈՓՈԽՈՒՄԸ

19. Հուշարձանի փոփոխում է համարվում ցանկացած այնպիսի միջամտություն, որն առնչվում է հուշարձանի հատակագծային, ծավալատարածական կամ նյութական որևէ տարրի մեկ այլ լուծմամբ՝ մասնակի կամ ամբողջական փոփոխելուն, կամ հավելելուն՝ հաշվի առնելով հուշարձանի պատմական միջավայրի պահպանման և գեղարվեստական

ընկալման խնդիրները:

20. Հուշարձանների փոփոխման աշխատանքների կատարման համար որպես պատվիրատու հանդես են գալիս դրա սեփականատերը և (կամ) նրա համաձայնությամբ՝ օգտագործողը:

21. Պետական սեփականություն հանդիսացող և օգտագործվող հուշարձանների փոփոխման դեպքում՝ օգտագործողը, իսկ պետական սեփականություն հանդիսացող և չօգտագործվող հուշարձանների փոփոխման դեպքում՝ հուշարձանի կամ դրա տարածքում քաղաքաշինական գործունեություն ծավալողը դիմում է լիազորված մարմին: Դիմումում նշվում են նախատեսվող աշխատանքների նպատակը, անհրաժեշտությունը, բնույթը և ծավալը: Դիմումին կից ներկայացվում են՝

1) հուշարձանի սեփականատիրոջ գրավոր համաձայնությունը (եթե դիմողն օգտագործողն է).

2) հուշարձանի նկատմամբ սեփականության իրավունքի գրանցման վկայականի պատճենը.

3) լիցենզավորված անձանց կողմից կազմված՝ հուշարձանի տեխնիկական վիճակի մասին ակտը, դրա հիման վրա՝ պատվիրատուի և հեղինակի կողմից կազմված՝ հուշարձանի փոփոխման առաջադրանքի նախագիծը.

4) էսքիզային առաջարկի նախագիծը և բացատրագիրը (մեկ՝ թղթային՝ ցուցադրական, և մեկ՝ էլեկտրոնային կրիչի վրա):

22. Սույն կարգի 21-րդ կետով նախատեսված փաստաթղթերը թերի ներկայացնելու, դիմումում կամ կից փաստաթղթերում ոչ էական թերությունների (վրիպակներ, ոչ իրավաբանական անճշտություններ, թվաբանական սխալներ և նման այլ բացթողումներ) առկայության դեպքերում լիազորված մարմինը դրանք հայտնաբերելու պահից 2 աշխատանքային օրվա ընթացքում դիմումատուին առաջարկում է 5 աշխատանքային օրվա ընթացքում վերացնել թերությունները:

23. Սույն կարգի 21-րդ կետով սահմանված հիմքերով դիմումը մերժվում է, եթե դրա մասին պատշաճ ձևով նախազգուշացումը լիազորված մարմնի կողմից ուղարկվելու օրվան հաջորդող 5 աշխատանքային օրվա ընթացքում դիմումատուն չի վերացնում դիմումում կամ կից փաստաթղթերում առկա ոչ էական թերությունները կամ չի ներկայացնում անհրաժեշտ փաստաթղթեր կամ նյութեր:

24. Լիազոր մարմինը սույն կարգի 21-րդ կետում նշված փաստաթղթերը 14 աշխատանքային օրվա ընթացքում քննարկում է գիտամեթոդական խորհրդի նիստում: Գիտամեթոդական խորհուրդը նիստից հետո 5 աշխատանքային օրվա ընթացքում կազմում է հուշարձանի փոփոխման վերաբերյալ եզրակացություն:

25. Գիտամեթոդական խորհրդի՝

1) դրական եզրակացության դեպքում՝ հանրապետական նշանակության հուշարձանի փոփոխման թույլտվություն ստանալու համար լիազոր մարմինը սահմանված կարգով Հայաստանի Հանրապետության կառավարություն է ներկայացնում Հայաստանի Հանրապետության կառավարության որոշման նախագիծ՝ կցելով իր եզրակացությունը.

2) բացասական եզրակացության դեպքում լիազոր մարմինը 3 աշխատանքային օրվա ընթացքում դիմումատուին է վերադարձնում ներկայացված փաստաթղթերը՝ կցելով եզրակացությունը:

26. Տեղական նշանակության հուշարձանի փոփոխման դեպքում լիազոր մարմինը եզրակացությունը և փաստաթղթերը տրամադրում է պետական կառավարման համապատասխան տարածքային մարմնին: Պետական կառավարման տարածքային

մարմինը, եզրակացությունը և փաստաթղթերը համաձայնեցնելով շահագրգիռ գերատեսչությունների հետ, ստացված կարծիքների հիման վրա՝ օրենքով սահմանված կարգով և ժամկետում ընդունում է հուշարձանի փոփոխման թույլտվություն տալու կամ այն մերժելու մասին որոշում»:

2. Սույն որոշումն ուժի մեջ է մտնում պաշտոնական հրապարակմանը հաջորդող օրվանից:

Տիգրան Սարգսյան